

МОНГОЛ УЛСЫН ХУУЛЬ

2025 оны ... дугаар
сарын ...-ны өдөр

Төрийн ордон,
Улаанбаатар хот

ТАТВАРЫН ЕРӨНХИЙ ХУУЛЬД НЭМЭЛТ, ӨӨРЧЛӨЛТ ОРУУЛАХ ТУХАЙ

1 дүгээр зүйл.Татварын ерөнхий хуульд доор дурдсан агуулгатай зүйл, хэсэг, заалт нэмсүгэй:

1/6 дугаар зүйлийн 6.1.51 дэх заалт:

“6.1.51.“хууль даган мөрдөлтийн түвшин” гэж гааль, татварын албаны бүртгэл, мэдээллийн нэгдсэн сангийн мэдээлэлд үндэслэн татвар төлөгчийн гааль, татварын хууль тогтоомж даган мөрдөлтийг үнэлсэн үнэлгээг;”

2/6 дугаар зүйлийн 6.1.52 дахь заалт:

“6.1.52.“хэрэглэгчийн систем нийлүүлэгч” гэж татварын нэгдсэн системтэй холбогдох, татвар төлөгчид үзүүлэх цахим үйлчилгээ, үйл ажиллагааг гэрээний үндсэн дээр хэрэгжүүлэх хуулийн этгээдийг;”

3/6 дугаар зүйлийн 6.1.53 дахь заалт:

“6.1.53.“хэрэглэгчийн систем” гэж тус хуулийн 6.1.52-т заасан этгээдийн нийлүүлсэн программ хангамжийн системийг;”

4/6 дугаар зүйлийн 6.1.54 дэх заалт:

“6.1.54.“татварын нэгдсэн систем” гэж татварын бүртгэл, тайлагналт, ногдол төлөлт, хяналт шалгалт, мэдээллийн солилцооны үйл ажиллагааг цахим болон автоматжуулсан байдлаар нэгтгэн зохион байгуулдаг программ хангамж, мэдээллийн санг хамруулсан системийг;”

5/6 дугаар зүйлийн 6.1.55 дахь заалт:

“6.1.55.“төлбөр тооцоо” гэж бэлэн ба бэлэн бус төлбөр тооцоог;”

6/6 дугаар зүйлийн 6.1.56 дахь заалт:

“6.1.56."борлуулалтын нэхэмжлэх" гэж тухайн төлбөр тооцоо хийснийг нотлох он, сар, өдөр, дахин давтагдашгүй төлбөрийн дугаар, албан татвар төлөгчийн буюу худалдаа эрхлэгч, худалдан авагч албан татвар суутган төлөгчийн нэр, хаяг, татварын төлөгчийн дугаар, худалдаа хийгдсэн бараа, ажил, үйлчилгээний нэр, код, тоо хэмжээ, үнэ, төлбөр тооцооны болон татварын татварын дүн зэрэг мэдээллийг агуулсан цахим баримтыг;”

7/6 дугаар зүйлийн 6.1.57 дахь заалт:

“6.1.57."төлбөрийн баримт" гэж тухайн төлбөр тооцоо хийгдсэнийг нотлох огноо, дахин давтагдашгүй төлбөрийн дугаар бүхий нэгдсэн системээр баталгаажсан, татварын төлөгчийг таних тэмдэг бүхий нэр, газар зүйн байршил, татвар төлөгчийн дугаар, бараа, ажил, үйлчилгээний нэр, код, тоо хэмжээ, үнэ, төлбөр тооцооны болон татварын төрөл, дүнгийн мэдээллийг агуулсан цаасан болон цахим баримтыг;”

8/6 дугаар зүйлийн 6.1.58 дахь заалт:

“6.1.58."дахин давтагдашгүй төлбөрийн дугаар" гэж худалдаа, үйлчилгээ эрхлэгч татвар төлөгчийн дугаар, салбар, төлөөний газрын дугаар, төлбөр тооцооны он, сар, өдөр, төлбөр тооцооны дэс дугаарыг дунд нь ямар нэг тэмдэгт хэрэглэлгүйгээр үргэлжлүүлэн тоон утгаар илэрхийлсэн дугаарыг;”

9/9 дүгээр зүйлийн 9.3 дахь хэсэг:

“9.3.Татвар ногдуулах, татвараас хөнгөлөх, чөлөөлөхөд баримтлах "Эдийн засгийн бүх төрлийн үйл ажиллагааны салбарын ангилал"-ыг санхүү, төсвийн асуудал эрхэлсэн Засгийн газрын гишүүн, Үндэсний статистикийн хорооны дарга хамтран батална.”

10/13 дугаар зүйлийн 13.6 дахь хэсэг:

“13.6.Төлбөрийн баримтын мэдээллийг доор дурдсанаас бусад этгээд танилцах эрхгүй бөгөөд задруулахыг хориглоно:

13.6.1.татварын алба;

13.6.2.статистикийн алба;

13.6.3.тухайн мэдээллийг дамжуулагч этгээд.”

11/35 дугаар зүйлийн 35.2.5 дахь заалт:

“35.2.5.эрсдэлийн удирдлага нь татвар төлөгчийг эрсдэлээс урьдчилан сэргийлэх, татварын хууль тогтоомжийг сайн дураар даган мөрдөхөд нь дэмжин туслах.”

12/73 дугаар зүйлийн 73.4 дэх хэсэг:

“73.4.Татварын хяналт шалгалтын томилолтыг олгосноос шийдвэр гарах хүртэл хугацаанд төлөөгүй татварт алданги тооцохгүй.”

13/76¹ дугаар зүйл.Татвар төлөгчийн хууль даган мөрдөлтийн түвшин

76¹.1.Гааль, татварын алба хууль даган мөрдөлтийн түвшнийг дараах үндсэн шалгуур үзүүлэлтийн дагуу тогтооно:

76¹.1.1.татвар төлөгчийн бүртгэл;

76¹.1.2.татварын тайлагнал;

76¹.1.3.татвар төлөлт;

76¹.1.4.татвар, гаалийн хууль тогтоомжийн зөрчил;

76¹.1.5.гаалийн бүрдүүлэлт.

76¹.2.Хууль даган мөрдөлтийн түвшин нь зуу хүртэлх тоон утгаар хэмжигдэх бөгөөд тоон утгад харгалзан маш сайн, сайн, дунд, хангалтгүй гэж ангилна.

76¹.3.Хууль даган мөрдөлтийн түвшнийг тооцох шалгуур үзүүлэлтийг энэ хуулийн 35.11-т заасан журмын дагуу шинэчилж, татвар төлөгчид мэдээлнэ.

76¹.4.Татварын алба нь татвар төлөгчийн хууль даган мөрдөлтийн түвшнийг сар, улирал, жилээр тодорхойлж, татвар төлөгчид цахим татварын системээр мэдэгдэнэ.

76¹.5. Энэ хуулийн 76¹.2-т заасан хууль даган мөрдөлтийн түвшнийг нэмэгдсэн өртгийн албан татвар төлөх хугацааг хойшлуулах, гааль, татварын албаны зөвлөн туслах үйлчилгээг хэрэгжүүлэхэд ашиглана.”

14/77 дугаар зүйлийн 77.7.16 дахь заалт:

“77.7.16.энэ хуулийн 77.7.8-д заасан сахилгын шийтгэл оногдуулах эрхийг тушаалаар харьяа албадын дарга нарт шилжүүлж болох бөгөөд Төрийн албаны тухай хуулийн 48.1.1, 48.1.2, 48.1.3-д заасан сахилгын шийтгэлийг ногдуулах эрхтэй.”

15/”77¹ дугаар зүйл.Татварын албаны зөвлөн туслах үйлчилгээ.

77¹.1.Татварын алба нь энэ хуулийн 75.1.1-д заасан чиг үүргээ доор дурдсан байдлаар хэрэгжүүлнэ:

77¹.1.1.шинэ бүртгэгдсэн татвар төлөгчийн хэрэгцээ шаардлагад нийцсэн, үүсдэг нийтлэг эрсдэлийн мэдээллийг агуулсан гарын авлага, заавар, зөвлөмжийг боловсруулан хүргүүлэх, танхимын болон цахим хэлбэрийн сургалтад хамруулах;

77¹.1.2.харьяалах татварын алба татвар төлөгчийн хүсэлтээр татварын бүртгэл, тайлагнал, төлөлт, тайлан боловсруулалттай холбоотой мэдээлэл, заавар, зөвлөгөөг өгөх;

77¹.1.3.татварын хууль тогтоомж, татварын тайлангийн маягтад өөрчлөлт орсон тохиолдолд төрийн мэдээлэл эмхэтгэл хэвлэгдсэн, эсхүл улсын нэгдсэн бүртгэлд бүртгэгдсэнээс хойш 14 хоногийн дотор тухайн өөрчлөлтийг хэрэгжүүлэхэд анхаарах асуудлуудын мэдээллийг нийт татвар төлөгчдөд татварын бүртгэл, мэдээллийн цахим системээр дамжуулан хүргүүлэх, сургалт зохион байгуулах;

77¹.1.4.татвар төлөгчийн татварын хууль даган мөрдөлтийн түвшин буурах, татварын эрсдэлийн үнэлгээнд сөргөөр нөлөөлсөн, нөлөөлөх нөхцөл бүрдсэн тохиолдолд энэ талаар татвар төлөгчид урьдчилан мэдэгдэж, татварын тайлан, төлөлтөө өөрөө засах, зөрчлөө арилгах боломж олгож, татварын эрсдэлээс урьдчилан сэргийлэх;

77¹.1.5.татварын хууль тогтоомжийг хэрэгжүүлэх, татварын хөнгөлөлт, чөлөөлөлт эдлэх боломжийн талаар татвар төлөгчид мэдээлэл, зөвлөгөө өгөх зорилгоор хиймэл оюун ухаан болон их өгөгдөлд суурилсан, 24 цагийн турш тасралтгүй ажиллах автомат хариулагчийг ажиллуулах;

77¹.1.6.худалдааны танхим, мэргэжлийн холбоо, салбарын асуудал эрхэлсэн төрийн захиргааны төв байгууллага, олон улсын байгууллага, гадаад улсын дипломат болон консулын байгууллагуудаас татварын хууль тогтоомжийг хэрэгжүүлэхтэй холбоотой тодорхой асуудлаар зөвлөгөө, сургалт авахаар ирүүлсэн хүсэлтийн дагуу сургалт, хэлэлцүүлэг зохион байгуулах;

77¹.1.7.олон нийтийн татварын боловсролыг нэмэгдүүлэх зорилгоор эрх бүхий байгууллагатай хамтран сургалтын болон боловсролын хөтөлбөр боловсруулан хэрэгжүүлэх, боловсролын байгууллагуудтай хамтран ажиллах;

77¹.1.8.татвар төлөгчдийн татварын боловсролыг дээшлүүлэх, татварын эрсдэлээс урьдчилан сэргийлэх, татварын хууль тогтоомжийг сурталчлан таниулах зорилгоор төр, хувийн хэвшил болон мэргэжлийн холбоодтой хамтран сургалт, хэлэлцүүлэг тогтмол зохион байгуулж, гарын авлага, зөвлөмж, аргачлалаар хангаж ажиллах;

77¹.1.9.энэ хуулийн 78 дугаар зүйлд заасан татварын хууль тогтоомж хэрэгжүүлэх зөвлөмж гаргах;

77¹.1.10.цахим хуудсандаа татварын хууль тогтоомжийг англи болон монгол хэлээр байршуулах, олон нийтийн мэдээллийн хэрэгслээр нийтийг хамарсан сурталчилгаа, сургалт, мэдээллийн нэвтрүүлэг зохион байгуулах, нийтлэл гаргах;

77¹.1.11.хуулиар зөвшөөрсөн бусад шаардлагатай арга хэмжээг авч хэрэгжүүлэх.

77¹.2.Энэ хуулийн 77¹.1-д заасан гарын авлага, зөвлөмж, сургалтын материал, дүрс бичлэг, сургалтыг брайль үсэг, дохионы хэлийг ашиглах шаардлагад нийцүүлэн хөгжлийн бэрхшээлтэй иргэдийг мэдээлэл тэгш авах эрхээр хангасан байна.

77¹.3.Татварын алба энэ хуулийн 77¹ дугаар зүйлд заасны дагуу зохион байгуулсан сургалт, хэлэлцүүлэг, зөвлөгөө, гарын авлага, зөвлөмж, хөтөлбөр мэдээллийг татварын албаны цахим хуудсанд олон нийтэд нээлттэй байршуулна.

77¹.4.Татвар төлөгч өөрийн эрхлэх үйл ажиллагаатай холбоотой татварын албанаас сургалт, хэлэлцүүлэг зохион байгуулах хүсэлтийг татварын албанд гаргаж болно.

75¹.5.Энэ хуулийн 75¹.4-д заасан хүсэлтийг хүлээн авснаас хойш 30 хоногийн дотор татварын алба хэлэлцүүлэг, сургалтын хөтөлбөрийг боловсруулан, товыг зарлан 45-аас доошгүй хоногийн хугацаанд хэлэлцүүлэг, сургалтыг зохион байгуулна. Хэлэлцүүлэг, сургалтын тов, хөтөлбөрийг Монголын худалдаа, аж үйлдвэрийн танхим, тухайн аж ахуйн нэгжийн үйл ажиллагааны салбарын мэргэжлийн холбоо болон бүх татвар төлөгчдөд нээлттэй мэдээлнэ.

75¹.6.Энэ хуулийн 75¹.5-д заасан хэлэлцүүлэг, сургалтын хөтөлбөрийг Монголын татварын мэргэшсэн зөвлөхийн нийгэмлэг болон шаардлагатай бусад мэргэжлийн холбоод хамтран боловсруулна.”

2 дугаар зүйл.Татварын ерөнхий хуулийн 8 дугаар зүйлийн 8.3 дахь хэсгийн “хуулийн” гэсний дараа “7.2.1,” гэж, 31 дүгээр зүйлийн 31.1 дэх хэсгийн “дараагийн” гэсний дараа “хоёр” гэж, 35 дугаар зүйлийн 35.11 дэх хэсгийн “хорооны” гэсний дараа “, татвар төлөгчийн хууль даган мөрдөлтийн түвшнийг тодорхойлох, мэдэгдэх” гэж, 47 дугаар зүйлийн 47.10 дахь хэсгийн “үлдээх,” гэсний дараа “бүхэлд нь эсхүл хэсэгчлэн” гэж, мөн зүйлийн 47.12 дахь хэсгийн “нөхөн ногдуулалтын акт” гэсний дараа “эсхүл актын холбогдох хэсэг” гэж, 53 дугаар зүйлийн 53.1.3 дахь заалтын “ажиллагаагаа” гэсний дараа “эрх бүхий байгууллагын шийдвэрээр” гэж, 74 дүгээр зүйлийн 74.2 дахь хэсгийн “тасаг,” гэсний дараа “татварын улсын ахлах байцаагч,” гэж, 75 дугаар зүйлийн 75.2 дахь хэсгийн “хангаж,” гэсний дараа “эрсдэлээс урьдчилсан сэргийлэх, холбогдох зөвлөгөө өгөх,” гэж, 77 дугаар зүйлийн 77.2 дахь хэсгийн “тасаг,” гэсний дараа “татварын улсын ахлах байцаагч,” гэж, 84 дүгээр зүйлийн 84.1.3 дахь заалтын “татварыг” гэсний дараа “тайлагнаж,” гэж тус тус нэмсүгэй.

3 дугаар зүйл.Татварын ерөнхий хуулийн дараах хэсэг, заалтыг доор дурдсанаар өөрчлөн найруулсугай:

1/15 дугаар зүйлийн 15.5 дахь хэсэг:

“15.5.Татварын алба хяналт шалгалтын зорилгоор гадаад улсын татварын албанаас мэдээлэл гаргуулах эхний хүсэлт гаргасан өдрөөс сүүлийн хүсэлтийн хариу хүлээн авах өдөр хүртэлх хугацаагаар татварын хөөн хэлэлцэх хугацааг тасалдсанд тооцно.”

2/28 дугаар зүйлийн 28.5 дахь хэсэг:

“28.5.Татвар төлөгч борлуулалт хийх тухай бүр хэрэглэгчийн системээс дахин давтагдашгүй дугаар бүхий төлбөрийн баримт, эсхүл борлуулалтын нэхэмжлэх үүсгэнэ.”

3/53 дугаар зүйлийн 53.1.4 дэх заалт:

“53.1.4.татвар төлөгчийн үйл ажиллагаанд 2 жил дараалан Компанийн тухай хуулийн 87.1.1-д заасан хувь хэмжээгээр алдагдал хүлээж, төлбөрийн чадвар муудсан нь татварын албаны хүлээн авсан тайлангаар тодорхойлогдсон.”

4 дүгээр зүйл.Татварын ерөнхий хуулийн 8 дугаар зүйлийн 8.6 дахь хэсгийн “зөвшилцөж, санал авсан байна.” гэснийг “зөвшилцөж, нэгдсэн саналд хүрсэн байна.” гэж, 33 дугаар зүйлийн 33.3 дахь хэсгийн “бүртгэл, мэдээллийн санг бүрдүүлэх, сангийн мэдээллийг” гэснийг “нэгдсэн системийн мэдээллийг бүрдүүлэх” гэж, 38 дугаар зүйлийн 38.8 дахь хэсгийн “жилийн эцсийн татварын тайлангийн хамт” гэснийг “дараа орны 06 дугаар сарын 30-ны дотор” гэж, мөн зүйлийн 38.8.1, 38.8.2 дахь заалтын “зургаа” гэснийг “арав” гэж, 47 дугаар зүйлийн 47.3 дахь хэсгийн “10 хувийг” гэснийг “5 хувийг” гэж, 53 дугаар зүйлийн 53.1.1 дэх заалтын “4.1.1-д заасан гамшиг болон үер, газар хөдлөлт, гал түймэрт өртсөн” гэснийг “4.1.1, 4.1.2, 4.1.3-т заасан гамшиг буюу аюулт үзэгдэл, аюулын улмаас татвар төлөгчид хохирол учирсан” гэж, мөн зүйлийн 53.3.1 дэх заалтын “10.0 сая” гэснийг “30.0 сая” гэж, 78 дугаар зүйлийн 78.1.1 дэх хэсгийн “төлөгчийн” гэснийг “төлөгч, Монголын худалдаа, аж үйлдвэрийн танхим, мэргэжлийн холбоо, татварын мэргэшсэн зөвлөхийн нийгэмлэгийн” гэж, 84 дүгээр зүйлийн 84.1.5 дахь заалтын “падаан” гэснийг “борлуулалтын нэхэмжлэх” гэж тус тус өөрчилсүгэй.

5 дугаар зүйл.Татварын ерөнхий хуулийн 38 дугаар зүйлийн 38.8.3 дахь заалт, 75 дугаар зүйлийн 75.6, 75.7, 75.8 дахь хэсгийг тус тус хүчингүй болсонд тооцугай.

6 дугаар зүйл.Энэ хуулийг 2026 оны 01 дүгээр сарын 01-ний өдрөөс дагаж мөрдөнө.

Гарын үсэг